

Izjava: Izjava OHR-a o pomilovanjima

Visoki predstavnik Paddy Ashdown odgovorio je predsjedniku Federacije BiH Niki Lozančiću, gdje od njega traži da do kraja radnog dana 23. avgusta proslijedi više informacija u vezi sa predsjedničkim pomilovanjem Miroslava Prcea, koji je 2004. godine osuđen na petogodišnju zatvorsku kaznu zbog zloupotrebe javnih fondova.

Gospodin Lozančić je 19. avgusta ove godine u pismu visokom predstavniku objasnio osnove za ovo pomilovanje. Međutim, ovo obrazloženje je potaknulo dodatna pitanja. Visoki predstavnik od gospodina Lozančića dodatno traži kopiju odluke o pomilovanju, zajedno sa dodatnom dokumentacijom koja se odnosi na odluku o odobrenju pomilovanja, uključujući medicinsku dokumentaciju.

Trenutno u BiH državni i entitetski predsjednici mogu odobriti pomilovanje tajno i bez obrazloženja. Svake godine bude podneseno oko hiljadu molbi za pomilovanje, a ipak nije jasno koliko ih bude odobreno. Prošle godine, nakon što je odobreno pomilovanje parlamentarcu Munibu Jusufoviću, visoki predstavnik je izmijenio Zakon BiH o pomilovanju, suspendujući odobrenje pomilovanja koja daju državni zvaničnici sve dok ne bude usvojen novi Zakon BiH o pomilovanju. Sada je u izradi nacrt zakona koji će sadržavati obavezu da sva pomilovanja budu javna, sa obrazloženim razlozima za pomilovanje.